


Сәкен СЕЙФУЛЛИН

ДОМБЫРА





Мекмен
кіманханасы

Сәкен СЕЙФУЛЛИН

ДОМБЫРА

Өлеңдер мен дастандар

Алматы

2005

ББК84 Қаз 7-5

C32

**Кітап Қазақстан Республикасы Мәдениет, ақпарат және спорт
министрлігінің бағдарламасы бойынша шығарылып отыр**

C32 СЕЙФУЛЛИН Сәкен. Домбыра.
Олеңдер мен дастандар. Алматы.
ҚАЗАКЛАРАТ., 2005. – 127 бет.
ISBN 9965-643-36-9

Бұл кітапқа ақынның әр жылдары алуан тақырыпқа жазған
таңдаулы өлеңдері мен лирикалық туындылары және
“Көкшетау”, “Аққудың айырылуы” атты тамаша дастандары
енген.

ББК84 Қаз 7-5

С 4702250202
452 (05)-05

ISBN 9965-643-36-9

©С.Сейфуллин, қайта басылым, 2005
© “ҚАЗАКЛАРАТ”, 2005

ДАСТАНДАР

КӨКШЕТАУ*

Арқаның кербез сұлу Көкшетауы,
Дамылсыз сұлу бетін жуған жауын.
Жан-жақтан ертелі-кеш бүлттар келіп,
Жүреді біліп кетіп есен-сауын.

Сексен көл Көкшетаудың саясында,
Әрқайсы алтын кесе аясында,
Ауасы дертке дауа, жұпар иісін
Көкірек қанша жұтса, тоясың ба?

Үргалған көкке бойлап қарағайы,
Қасында көк желекті әппақ қайың,
Жібектей желмен шарпып төңіректі,
Балқытып мас қылады иіс майы.

Қарағай биік шыңды киялаған,
Еш адам оны барып қия алмаған,
Шанқылдап тау жаңғыртып, шыңға қонып,
Жалғыз-ақ көк қаршыға ұялаған.

Көкпенкөк шың басынан мұнар кетпес,
Басына атсан ғағын жетпес.
Бір жұтсан Көкшетаудың жұпарынан,
Өлгенше көкірегіңнен құмар кетпес.

* Дастан ықшамдалып беріліп отыр.

Сары алтын Көкшетаудың ерте-кеші,
Тау мен күн сүйіскендей еркелесіп,
Суретті шежіресі өткен күннін,
Сілекей ағызады ертегісі.

Талай сыр ертегіні ел айтады,
Ызында таудан сокқан жел айтады.
Сырласып сыйырласқан жапырақтар
Кундіз-тұн күніренген көл айтады.

Толғанып тәмен қарап шал айтады,
Тамсанып-таңырқанып бала айтады.
Тау-тасты түңжыраған күә қылып,
От басы қатын-қалаш — бәрі айтады.

Ертегі болмаса да хатта қалған,
Аузында шежіренің — қартта қалған.
Қарттардың баян қылған әңгімесін
Есіткен кейінгілер жаттап алған.

Жеке батыр

Болыпты баяғыда Жеке батыр ...
Тау бағып жатады еken тігіп шатыр.
Бір күні қарауылда қалғып кетіп,
Сол батыр* бүтінгеше үйықтап жатыр.

Сол батыр осы күні бір үлкен тау,
Кез жұмған көкке қарап сыры үлкен тау.
“Үйықтаған батыр” дейді таудың атын,
Адамша көлбеп жаткан кыры үлкен тау.

* Үйықтаған батыр (*Спящий рыцарь*) деген тас бар.

Батырдың қырыққа таяу келген жасы,
Денесі биік жота, таудай басы,
Сақалы төсін жапқан, қыр мұрынды,
Килюлі баста жатыр дулығасы.

Бурабай

Тағы бір ақбас бура - емес атан,
Жүріпті Көкшетауды қылышп Отан.
Мұны да “көзі көрген” қарт айтады,
Тыңдаған әлеуметке алқа-қотан.

Тағы еken жанға ұстаптай жүрген қашып,
Күркіреп тұрады еken көбік шашып,
Бір көлді мекен қылышп күнде келіп,
Су ішіп кетеді еken алшаң басып.

Дүниеде әрбір бөлек жердің аты,
Себеппен қойған бәрі елдің аты;
Бурабай атандыты содан бері
Ақ бура мекен қылған көлдің аты.

Мөп-мөлдір Бурабайдың сұы күміс,
Көргенде шаршаған жан алар тыныс.
Мінбелеп қоршалаған шымылдықтай
Қарағай, қайың менен қалың жыныс.

Ақ көбік көпіреді күміс судан,
Сан сұлу сол көбікпен бетін жуған;
Көл басы бірде күнқіл, бірде у-шу,
Әңгіме, сансыз сырлы ертек туған.

Ақ бура көп жыл тауды қылған мекен
“Бір үлкен іс боларда сезеді еken”.

Ол істі елге айтқанда маңайдағы,
Бақсыдай тауды азынап кезеді екен...

Шабысып бірін-бірі ел қуар болса,
Не өлмек, не бір батыр туар болса,
Немесе бір апатқа ел ұшырап,
Кәрі-жас бетін жаспен жуар болса.

Бақсыдай бура азынап жүреді екен,
Мал шулап, иттер ұлып үреді екен.
Қалың ел маңайдағы құрбан шалып,
Құлақты алдағы іске түреді екен.

Қара бұлт тауды төніп басады екен,
Құркіреп жерге зәрін шашады екен.
Аспаннан қып-қызыл от жерге шашып,
Таудағы аң пана таппай, сасады екен.

Білген сон бураның бұл қасиетін,
Үлкеннің кіші тыңдал өсиетін,
Тұнеріп долы бұлттай қурілдеген
Бураға болмапты енді жүрт тиетін.

Баласы Абылайдың Қасым төре,
Жасынан сотқарлығы басым төре,
Бір күні тау ішінде келе жатты,
Өзіндей бір топ жігіт қасында ере.

Бәрінің асынғаны – қару-жарак,
Соқтықкан өңкей сотқар жалақ-жалақ.
Найзамен неше түрлі ат үстінде
Ойын ғып келе жатқан көлді жанап.

Тастарды, ағаштарды қылып қарак,
Ыскыртып келе жатқан өткір садак.

Бураны Қасым төре сөз қылыпты,
Кез келсе, атпақ болып төстен қадап.

Қасым хан туғаннан-ақ қанға құмар,
Дірілдеп өлім күткен жанға құмар.
Анадан қан уыстап туған мұндар
Қан ұрттап жүрсө ғана көңлі тынар.

Сол кезде шыға кепті ақбас бура,
Жап-жалбыр төсін басқан әппак шуда.
Қасым хан тұра қалып, ақ бураны
Шіреніп атып сапты нақтап тұра.

Өкіріп ақбас бура көбік шашып,
Шиқылдап тісін қайрап, аузын ашып,
Қасымды бір айналып алқа-қотан,
Қан ағып кеткен тулап таудан асып.

Бақсыздай сарнап бура тауды кезген,
Күніреніп мекенінен енді безген.
Ел естіп хан ұлының бұл жұмысын,
Зор іске ұшырарын бәрі сезген.

Жоқ болып ақ бас бура көп күн өткен,
(Қасымның қан қолынан қаза жеткен).
Бір күні таудай болып шөгіп жатқан
Бураны “көреді” жүрт өткен, кеткен.

Құбылаға басын беріп шөгіп жатқан,
Көк мұнар қалың ойға шомып батқан,
Ақ бура қабактарын қарс жауып,
Қозғалмай мәңгі жатып, тас боп катқан.

“Ақ бура таудың тағы түйесі, – деп,
О дағы қасиетті бір иесі, – деп,

Тұқымы сотқар ханның оңбағаны,
Жұрт айтады, – сол түйенің киесі”, – деп.

Бұл іске Бурабайдың көлі куә,
Қасымның қалған жұрты, көні куә,
Бураша шөгіп жатқан мұнар тау мен
Ызындал таудың соқкан желі куә...

Оқжетпес

Көк торғын Көкшетауды мұнар басқан,
Бастары көкке бойлап бұлттан асқан.
Бір шың бар етегінде тіп-тік найза
Адамзат жасағандай құйған тастан.

Сүп-сүйір бейне найза шың, құз, биік,
Төбесі кейде тұrap бұлтқа тиіп.
Қарасаң етегінен шың басына,
Тақияң жерге түсер тұрған киіп.

Тіп-тік шың көкке қарай кеткен бойлап,
Тұрғандай таусылмайтын бір ой ойлад.
Жалғыз-ақ шың басында нокаттай боп,
Құйқылжып қалықтайды бүркіті ойнап.

Басына атсан дағы оғың жетпес,
Иіліп ешбір тауға тәжім етпес,
Сол шыңға жан шықлаған ұя салып,
Шанқылдал қаршыға мен бүркіт кетпес.

Осы шың Бурабайдың жағасында,
Күнбатыс тауға кірген сағасында,
Орта жұз хан Абылай заманында
Айтарлық бір іс бопты тағы осында...

Ертегі толып жатыр өткен-кеткен;
Өтірік-шынды әңгіме бізге жеткен.
Әйтеуір ырасы сол: Көкшетауды
Ел шапқыш хан Абылай мекен еткен.

Біреулер батыр мен би, ханды мактап,
Бұрынғы надан, шірік занды мактап,
Сарнайды, жыр қылады сөзін сырлап,
Бақсыдай жын шақырған сандырактап.

Тартынбай қан төккенді “батыр” деген,
“Бір өзі жүз кісіге татыр” деген.
Зиянсыз момындарды шаруа бакқан
“Қолынан түк келмейтін қатын” деген.

“Хан” деген жерге тамған қанға құмар,
Дірілдеп өлім күткен жанға құмар;
Жазықсыз бейпіл жатқан елді шауып,
Типыл ғып жер күніренткен даңға құмар.

“Би” деген сез куғандар арамтамақ,
Бәсеке бір-бірінен алған сабақ;
Ел жайын терең ойлап піше алмаған,
Сөз біткен қимылымен қас пен қабақ.

Көп тындалап, көп тексердім осындейды,
Мақтарлық қылық, міnez табылмайды.
Оқушы оқып өзі баға берер,
Өлеңге қостым мен де Абылайды.

Абылай орда қылған Көкше тауын,
“Аударған қонысынан талай жауын”,
Бір жылы, жаздығуні, қалмақ елін
Шаппақ боп қол жиыпты айтып сауын.

Қазақ пен қалмақ көрші заман болған,
Жылы жоқ шабысудан аман болған;
Қара күш сотқарлықпен ел бастаған,
Екі ел де аң тәрізді надан болған.

Жөнелді ханның қолы жынша шұбай;
Егей төс, мінгендері ығай, сыйғай.
Тыныш елге батырсынып шеру тартты,
Лек-лек боп қосындасып ыңғай сыйбай.

Сайланып шыққан ірік өңкей кегей;
Сайласып мінгендері ылғи егей.
Асынып жақтарын құнтиысып,
Аттарын тұқыртады, шіреп шегей.

Шұбырып ханның қолы жүріп кетті,
Жылыдай қан ұрттауға бұрып бетті.
Жол жүріп бірнеше күн шеру тартып,
Қалмаққа бейбіт жатқан келіп жетті.

Атының құйрығы мен жалын түйіп,
Бәрі де көйлектерін сырттан киіп,
Қалмақтың ордасына үрпек басты
Көк найза, дабыл қағып, қалды тиіп.

Ат қойды қалың әскер андағайлап,
Дұрсілі жер қозғалтып “Абылайлап”.
Тыныш жатқан қалмақ елі қас қаққанша
Ү-шу бол шаң астында қалды ойбайлап.

Біреулер ысқыртады садақты атып,
Біреулер қанды қанжар жалақтатып.
Біреулер найзаменен жас баланы
Іліп ап көтереді салақтатып...

Таптады атпен басып қалмақ елін,
Қан көбік сорғалатып аттың терін,
Олжалап қыз, қатынын атқа өңгеріп,
Бауыздап алдарында еркектерін.

Қасқырдай ырылдайды күшін біліп,
Жарады жүкті әйелді ішін тіліп,
Баласын қанжарменен тілерсектен
Бір сұғып керегеге кетеді іліп.

Тағы да қанды қанжар жалақтатып,
Көздерін жын соққандай алақтатып,
Кез келсе кек сақтар ер басын кесіп,
Байлайды қанжығаға салақтатып...

Әйелдің сұлуы мен жасын сайладап,
Қосақтап бір-біріне шашын байлап,
“Олжалап” қойша қағып, қан-қан болып,
“Батырлар” шықты қайта топтап айдалап...

Жас бала, кемпір-шалды бордай басып,
Аттарын ентелете борбайласып,
Айдалған мал-мұлік пен жас әйелдер,
“Бауырым” -dap... шуласады ойбайласып.

Хан қайтты қанға батып, елді шауып,
Шұбыртып ел күнірентіп, “олжа тауып”.
“Осылай шаба берсем, — дейді Абылай, —
Кетерсің, бәлем қалмақ, өзің де ауып”.

Абылай бір жерге кеп аттан қонды,
Сол тұста жиып алды қалың қолды.
Ерулеп, желпісініп қалың әскер,
Гүілдеп мошады бір үлкен жонды.

Абылай батырларын алды жиып,
Үлескө олжаларын салды жиып,
Сол жерде бір сұлуға талас болды,
Бере алмай біреуіне бірі қызып.

Қамалап сол сұлуға қарасыпты,
Бәрі де “мен алам” деп таласыпты.
Жолына тұтас байлап мал мен мүлкін,
Сұлуды бір-бірінен қаласыпты.

Сұлуды өз көзіммен көрмеген соң,
Көркіне көріп баға бермеген соң,
Сұлу деп жұрт айтады, мен білмеймін,
Қасына Абылайдың ермеген соң.

Қалмақты шауып-шаншып қайтушылар,
Болмасын бұл сұлуға қайтып құмар?
Сол қыздың көркемдігін айта алмайды
Бұл істі дәмдендіріп айтушылар.

Сол қыздың он жетіге келген жасы,
Оралған аш беліне қолаң шашы.
Қап-қара қарлығаштың қанатындаидай
Иілген ақ мандауда екі қасы.

Аш белі көк шыбықтай солқындаиды,
Қолаң шаш бейне жібек толқындаиды.
Батырлар сол сұлуға салыстырған
Жалғыз-ақ аспандағы Күн мен Айды.

Киысқан бұрын талай сый сияқты
Сұлуды бір біріне қиыспапты.
Жауласып бір қыз үшін қалың өскер,
Дауласып, кең далаға сиыспапты.

Сұнқардың баласындаі торға түскен,
Құланның құлынындаі орға түскен,
Тұтқын қыз жауларына жаутаңдайды,
Киіктің лағындаі қолға түскен.

Сөзбенен бірін-бірі жеңісे алмай,
Жолдасып ынтымаққа келісे алмай;
Аттанды қалың әскер гүжілдесіп,
Сұлуды бір-біріне берісе алмай.

Жеткенше соныменен Көкшетауға,
Ала алмай бір-бірінен сұрап сауға,
Қалың қол Бурабайдың сағасына
Кеп қонды, бітім қылмақ талас-дауга.

Тұбектей айнала тау — берік қорған,
Қаптаған тау мен тасты қап-қара орман,
Бурабай жағасында оқ жетпес шың;
Жағалай сол жерге кеп әскер қонған.

Тілдесіп тау мен аспан сүйіседі,
Сәлем қып бұлттар басын иіседі.
Қырыдан келген қаңғып түрлі бұлттар
Бас қосып тау төсінде түйіседі.

Қалың қол шомылсып күміс сұға,
Өздерін, аттарын да шомып жуған.
Тігісіп шатырларын тыныққан соң,
Таласты айналдырды үлкен шуға.

Жаутандап тұтқын қыздар жауларына,
Елеңдеп құлақ салып дауларына,
Бәнде боп қасіретпен қарасады
Матаған қол-аяқта бауларына.

Желбіреп алқа-қотан шатырлары,
Айтысып сұлу үшін жатыр бәрі.
Абылай көк шалғынға кілем тәсеп,
Әмірмен жинап алды батырларын.

— Батырлар, бәріңізде олжа толық.
Әмісе он болғай да біздің жорық.
Жүрмендер жамандасып өкпе сақтап,
Себебі олжадағы бір қыз болып.

Бұл талас түсті менің қарауыма,
Қайтсемде көнесіндер балауыма.
Бәрінді көріп өзі таңдау қылсын,
Бүйірдым “тұтқын қыздың қалауына”.

Батырлар түрегелді “алдиярлап”,
Тізіліп тұтқын қызға болды бармак.
Тұтқын қыз кімді таңдап, қалау қылса,
Сұлуды қатын қылышп сол болды алмақ.

Жіберді қызға Абылай “барып кел” деп,
“Немесе өз алдыма алып кел” деп.
“Біреуін батырлардың таңдау қылар,
Ұқтырып құлағына салып кел” деп.

Батырлар талас сөзді қойып енді,
Тұрысты тәуекелге буып белді.
Жіберген Абылайдың жігіттері
Ортаға тұтқын қызды алып келді.

Ашаң жұз ақ шапақтап атқан таңдай,
Аш белі көк шыбықша майысқандай.
Үзілген қызғалдақтай өні солғын,
Қабыргаң көрсөн аяп қайысқандай.

Секілді қолға түскен бала киік,
Мергеннің әлсіреткен оғы тиіп.
Күйік пен қасіретін жасыра алмай,
Кеп тұрды хан алдында басын иіп.

Томсарып сұлу тұрды басын иіп,
Женіл ме жас басына келген күйік.
Қалмақтың, алақандап қанын ішкен
Қалайша қатын болсын жауын сүйіп?

Абылай тұтқын қызға салды көзін,
Сөйледі әмір-білік айтқан сөзін:
“Жарқыным, өңкей батыр мына тұрған,
Қара да, біріне ти тандап өзің”.

Батырлар тұрған боймен қалды қатып,
Қадалып тұтқын қызға көзben атып.
Тулайды жүректері дәйек қылмай,
Таңдар деп сұлу, шіркін, кімді ұнатып!

Бәрінің жүректері аттай тулап,
Жұздері құбылады өні қурап,
Қалың қол тым-тырыс боп тұрды қарап,
Құледі көл мен ғана орман шулап.

Қыз айтты: “Құлдық, тақсыр, төреңізге,
Тағдырдың салған ісін көреміз де,
Адамды жете байқап сынамасақ,
Бір көріп, тұра баға береміз бе?

Я, тақсыр, менен таңдау сұратсаныз,
Бұл істі осылайша ұнатсаныз,
Таңдайын төреңізге құлдық айтып,
Өнерін батырлардың сынатсаныз.

Тиейін садағы үшқыр мергеніне,
Көзіммен асқандығын көргеніме.
Байланған мына шыңның қақ басына
Жаулықты атып жығып бергеніне”...

Абылай көнді қыздың тілегіне,
Серт болды батырлардың білегіне.
Етектен шың басына көз жіберіп,
Зор күдік кірді әркімнің жүрегіне.

Кыз шешті орамалың беліндегі —
Бір адам серт қып берген еліндегі...
Сағымдай көз алдынан ағып өтті
Жас өмір туып-өскен жеріндегі.

Жібекпен шайы орамал кестелеген,
Айнала жазуы бар “есте” деген.
“Егер де айтқан серттен таяр болсан,
Мейлің жырт, мейлің өрте, шеш те” деген.

Жұмбакты жазуларға қарап алып,
Тастады хан алдына орамалың.
Батырлар қозғалысып шапырласты,
Ентелеп хан мен қызды орап альп.

Абылай түрегелді даусын кернеп,
Сөйледі құлжадай бол қолын сермеп:
“Батырлар, бір қызық сын келді, міне,
Мініңдер аттарыңа жылдам ерлеп!

Іңғайлы бір он жігіт сайлансын тез!
Орамал шың басына байлансын тез!
Садақ пен құлаш сынар кезі келді.
Серіппе садақ оғы қайралсын тез!...”

Он жігіт белге байлап арқан жіпті,
Мысықша өрмелесіп шыңға шықты.
Байланған серт орамал найза ағашты
Үргалтып шың басына әрең тікті.

Батырлар даярланып баптанысты,
Белсеніп онтайланып аттанысты.
Шіреніп үзенгісін сықырлатып,
Айтулы жерге шығып саптанысты.

Қалың қол гүлдейді анталасқан,
Бәсеке бір қыз үшін тайталасқан.
Бір тасқа топ жанында қыз да шықты -
Тартыстың себепкери жан таласқан.

Кей батыр ойқастайды оғын сайлап,
Кей батыр безейді оғын өткір қайрап.
Шындағы орамалды оқлен іту -
Әркімнің тілегені “я, құдайлап”.

Орамал желбірейді қойған байлап...
Абылай: “Атындар”, — деп шықты айғайлап.
Батырлар шіреніспін тізбектеліп,
Тартысты садақтарын “Абылайлап”.

Дүрілдеп садақ оғы ыскырады,
Ойқастап аттары ойнап пыскырады.
Ышқынып жолбарыстай күшін өлшеп,
Батырлар садаққа оғын қыстырады.

Әуені ыскырады атқан садақ,
Қыз да тұр тас басында көзін қадап,
Етектен шыңға қарай көкті жарып,
Әндептіп тасқа тиген оқты санап.

Қарасып қалың өскер тұрды анталап,
Әркімнің шыңға ысқыртқан оғын санап.
Қызыққан жас сұлуға дәмеліден
Қалмады оқ атпаған бір нанталап.

Атқан оқ тасқа тиіп, жарқылдайды,
Шында ойнап бала бүркіт шаңқылдайды.
Оқтарын орамалға жеткізе алмай,
Батырлар біраздан соң “қарқындайды”.

Шіреніп садактарын шыңға кезеп,
Сығалап орамалға оғын безеп,
Дағдарды оғын ешкім жеткізе алмай,
Ысқыртып садактарын кезек-кезек.

Ешқайсы сыннан сөйтіп өтпеген соң,
Қыз қайтсін “өзін таңдау ет” деген соң.
“Оқжетпес” деген атақ алыпты шын,
Атқан оқ нақ басына жетпеген соң.

Бой жазу*

Күй шіркін кейде серпіп қыландайды,
Кейде пөс, кейде сейдін, сылаңдайды.
Кейде жай кібіртікеп, ақсай жылжып,
Кейде ырғып, актүлкіше бұландаиды.

Сұлуша кейде өсемдеп бұрандайды,
Мәстекше кейде мешел тырандайды.
Кермеге байласаң да жері тарпып,
Тұлпарша кейде шапшып тұра алмайды.

* Бас жаты ертерек жазылып, аяғын жазғанша арасына үш жыл түсін кеткен. Сөкен соны ескертеді.

Күй шіркін әуел құлаш салған еді,
Шалықтап өрттей жүйткіп жаңған еді.
Дестелеп Көкшетаудың ертегісін,
Тізбектеп біраз жыр ғып алған еді.

Әйткенмен шіркін жүйрік талған еді,
Қарқыннан біраздан соң танған еді.
“Оқжетпес” ертегісін бітіргендे,
Үзіліп жыр тізбегі қалған еді.

Бас жағы бұл ертектің жазылғалы,
Әңгіме белуардан қазылғалы,
Екі-үш жыл болса дағы, кейінгісін
Жазуға қалам алдым қазір ғана ...

Қалмақ қызы

Жұмбақтас

Батырлар аптырактап, зорланысып,
Қамалды қалың әскер қорланысып.
Өрлігін кербез шыңың енді байқап,
Үндемей хан да тұрды зор намыс қып.

Тұрды да тас басында қалмақ қызы,
Таласып қалың әскер алмақ қызы:
“Я, таксыр, үшке шейін бәйгі қылам,
Өзініз ерік берген соң таңдатқызып.

Бірінші сыннан адам өтпей тұр ғой,
Ешкімнің оғы шыңға жетпей тұр ғой,
Мінеки, көріп тұрсыз, оқ атұға
Еш батыр енді талап етпей тұр ғой.

Енді екі бәйгі тігіп қарайын да,
Көрейін не жазу бар талайымда.
Үш сынның екеуінен озған ерді
Сыныма толған ер деп қалайын да ...”

Ойқастап қызға Абылай жақын келді,
Ұнатып қыздың сөзін мақұл көрді:
“Жарқыным, енді бәйгің колдан келмес
Іс болып жүрмесін” — деп ақыл берді.

Қалың қол тұрды қоршап анталасып,
Лепірген қарқындарын біраз басып,
Қамалға шауып қайтып кеп түрғандай,
Жауменен жағаласып, жанталасып.

Құлімдеп алтын күн мен биік аспан,
Қарасып айна көлге жымындақсан.
Құледі айнала тау, қалың орман,
Тек қана ұн шықпайды түйіқ тастан.

Қаз бенен акқу көлде қаңқылдайды,
Шарықтап бала бүркіт шаңқылдайды.
Құбылған құстардың ән, күйлерімен
Жаңғырып тау мен орман саңқылдайды.

Қалықтап қара бүркіт көкті шарлап,
Шарықтап айналады тауды барлап,
Шаңқылдап құздан құлап көк қарышға,
Түйілер атқан оқтай төмен зарлап.

Батырлар айнала түр тас қасында,
Алғандай бір-бір сұлу бас-басына.
Бәйгіге бірі қалмай түспек тағы,
Абылай бәсекенің бас-қасында.

Жауының елін шапқан ортасында
Тапжылмай сұлу да түр тас басында.
Ұшсын ба ... қайтсын енді тұтқын бенде,
Кез болған бәлесі аз ба жас басында?..

Анталаң, қамалаған көп жыртқышқа
Жемтікше оңай өзін тастасын ба!
Зарлаған сөз өтпейтін нойыстарға
Жалынып жылап ылғи қақсасын ба?..

Қыз айтты Абылайдың сөзін тыңдал:
“Я, таксыр, біздікі тек мойынсұнбақ.
Екінші бәйгі оп-оңай: күш сынасу,
Онан соң үшіншісі: женіл жұмбақ.

Өлшенсін осы тасқа мың қадам жер,
Жарыссын сол арадан дәмелілер,
Төрт адам жүгі болсын жарысканда,
Болмасын бекер еркек босқа арам тер.

Таппадым женіл бәйгі бұдан басқа,
Сол ғана озған болад бұл таласта,
Көтеріп төрт кісіні жүгіріп кеп,
Кім бұрын алтып шықса мына тасқа”.

Абылай батырларға: “Серпіл!..” - деді,
“Жаяу тұс, бас дәмелің желпін”, — деді.
“Бәйгілік жер мөлшерле..”, — дегеннен соң,
Жүгіріп, даяршылар елпілдеді.

Батырлар дабырласып аттан түсті,
Қалың қол тамаша етті “қызық істі”.
Армансыз тоқайласқан жаумен емес,
Сынаспақ болды өзара қара күшті.

Абылай ат үстінде күпілдейді,
Ойқастап, қоразданып дікілдейді.
Лепірген апырақтап батырлардың
Күпті бол жүректері лұпілдейді.

Абылай асықтырып дігерледі...
Батырлар аттарын тез шідерледі.
Күшіне бекем сенген дәмелілер
Алшандап білектерін жігерледі.

Бой тартып кейбіреулер енді бұқты,
Алшандап кейбіреулер алға шықты.
Балтыр мен білектерін жалаңаштап,
Шайқалып іріктелді қырық-ақ мықты.

Көк құрыш бұлшық балтыр-білектері...
Тулайды дұрсіл қағып жүректері.
Майданда сыннан озып сұлуды алу –
Қазіргі әрқайсының тілектері.

Көркем қыз даурықтырды қалың қолды,
Бәйгіден келер еken қандай жолды?
Жамырап, реттеніп самбырласып,
Жарыспақ дәмелілер дайын болды.

Айнала қоршаған тау, орта даң-дұн,
Өлшеді “қыз тасынан” мың қадамды.
Жөнелді балуандар алшаң басып,
Әрқайсы ертіп алып төрт адамды.

Қырық батыр аяндады тайталаса,
Желіккен әскер ду-ду, анталаса.
Қасында шатырлардың матаудағы
Банадан тұтқын күндер “таң-тамаша”...